

PENGHAYATAN AGAMA SEBAGAI PEMERKASA NILAI INSAN: KAJIAN TERHADAP GOLONGAN PEKAK DI KUALA TERENGGANU

Nor Salimah Abu Mansor

Fakulti Pengajian Kontemporari Islam, Universiti Darul Iman Malaysia,
Kampus KUSZA, Gong Badak, 21300 Kuala Terengganu;

E-mel: norsalimah@udm.edu.my;

Tahap Pengajian: Ijazah Doktor Falsafah, Universiti Kebangsaan Malaysia

Penghayatan agama (religiosity) merupakan cara bagaimana manusia atau masyarakat menghidupkan agama dalam kehidupan mereka, menjadikan agama bukan hanya acara ritual tetapi sebagai cara hidup, atau lebih jauh dari itu menjadikan agama sebagai pemangkin untuk memperkasa rohani, jasmani dan intelektual untuk merubah suasana sekeliling hingga akhirnya terbina tamadun. Berdasarkan hakikat ini, penghayatan agama merupakan suatu bidang yang signifikan untuk dikaji, terutama dalam situasi Malaysia sedang membina aspirasi ketamadunan dengan memberi tumpuan kepada modal insan (*human capital*) yang berteraskan pengetahuan dan kemahiran. Dalam konteks pembinaan tamadun, modal insan seharusnya dilihat dalam kerangka *sumber daya insani* yang meletakkan penghayatan agama sebagai asas paling penting bagi membentuk manusia yang seimbang dan berintegriti. Dalam konteks golongan OKU pula, penghayatan agama cuba dilihat sebagai penguat dan pemberdaya golongan ini dalam kehidupan mereka walaupun dengan keterbatasan kemampuan yang ada. Kertas kerja ini bertujuan mengkaji konsep penghayatan agama (PA) dan tahap PA golongan pekak di Kuala Terengganu. Dalam mengkaji konsep PA, kajian ini menggunakan kaedah analisis kandungan (*content analysis*) dari hasil penulisan dan pemikiran tokoh-tokoh sarjana Islam. Hasil kajian ini menunjukkan sarjana Islam meletakkan penghayatan agama sebagai syarat penting kesempurnaan beragama dan sebagai suatu daya kawal manusia berfikir dan bertindak secara betul. Dalam mengkaji tahap PA golongan pekak, pengkaji turut meneliti kesan dan aplikasi PA terhadap mereka melalui temubual tidak berstruktur (dengan khidmat jurubahasa) dan pemerhatian. Walau bagaimanapun, tahap PA yang dibincangkan hanya dari aspek pengetahuan agama sahaja. Berdasarkan hasil kajian, tahap pengetahuan agama kebanyakan golongan pekak di Kuala Terengganu berada pada tahap sederhana dan aspek pengetahuan agama didapati memberi kesan ke atas sikap dan keperibadian mereka. Selain itu, hasil kajian turut mendapati individu pekak yang mempunyai pengetahuan agama yang tinggi mempunyai cara dan budaya hidup yang lebih baik dan teratur, lebih komited dalam amalan dan aktiviti keagamaan, memiliki kesedaran dan motivasi kerja yang tinggi, bertanggungjawab terhadap nafkah keluarga serta lebih bersemangat untuk meningkatkan kemajuan hidup.